

# Mud Volapüka

Nüm 78

13 tobul 2017

---

## Bukemaboed

Fövot lekoned-mära yutopik  
„Ventürs hieła ‚Nenolikan‘ e flenas omik“  
fa hiel „N. N. Nosov“

Kapit teldegjölid. Rekosil.

Tü del fovik baol pejenükon, keli valikans sovemo ädastebedons. Buigs pideköl ästadons zü klöpapiadil danüdik. Änidons me köls levelik äsvo domils pitakekik. Sus piadil jainils piatenidükons, pö kels lantärils e stänils vieliks älenlagons. Stänils e lantärils dientifiks älagons pö bims valik züo. Bim alik äsümedon ad pein nulayelik pideköl.

Musigalef binü jicilils deg ätopon pö tead telid priela pideköla me flors. Jicilil alik äbepläyof hapi. Is hap vemo smaliks äkomons, kelis änedos ad kipön pö nams; haps gretikum äkomons, kelis kipoy pö kiens; i haps gretik äkomons, kels paϑpladons sui glun, e hap bal äbinon muovemo gretik: ad bepläyön oni nedos ad bexänön tridemi.

Soar no nog ekömon, ab ya valikans ekobikons zü klöpapiadil ed ästebedons visitanis di Kaitöp. Klufülan ekömom bü valikans. Älenlabom jiti pelavöl, äbinom kliniku ed älabom heremi peköböl. Ye heratufil bal ebo pö sömit kap omik älöon löpio äsvo töp gokik, ab ga küpidiko älelogädos, das Klufülan staböfiko äbevobom heremi okik.



*„Benokömö!“*

„Nu binor hicililu benonatälik.“ - Katülan esagof ome. - „Bo, it plidor-la ad binön so deköfiku e klinöfikü.“

„Lesi.“ - Klufülan esiom, stedükölo jiti okik.

Pos Klufülan

Boadaskrubülan e Luibülan elüvaboms, e pos atans lödans votik di Kaitöp eprimons ad lükömön. Do nek ävüdon omis, ab alikan bevü etans äsagom, das elüvabom ad danön jicililis demü fluks e sunädo peävüdom ad baol.

Vüo Nenolikan verato äseadom pö taraks jüi prim baola. Jenöfo plu äseatom kas äseadom, sevabo äslipom, ab töbo eküpom, das hicilils eprimoms ad kobikön, esegolom ed älütevom ebo lü klöpapiadil.

Hicilils eküpoms omi ed eprimoms ad vokädön:

„Ag!, o cütan, koo elükömol! Konolöd vio äflitol ön donadil löpo [güflekiko]!“

„Konolöd vio äfidol lefogi pla muzil!“ - Bastetül ävokädöm, lüjutedölo lü om.

Nenolikan vemo eskanikom. Egüflekomi oki ed ämogolom. Hicilils äpovokoms bosu ome ed äsmiloms, ab etan igo no älilom.

No ätopidölo [ägolölo lunomiko, no zilogedölo], ereafom ad siem zifa,



ekobojokom ta kiud edämükom flomi okik ad böi. Estopikölo, elölogom ed eküpom nüpenädi pö kiud: „Nenolikan binom stupanu“.

„Ekö!“ - Nenolikan esagom. - „Ya penoy nüpenädis pö kiud dö ob.“

Äpidob oki sovemo, das no mögos ad bepenön atosi! Estutom ta kiud me flom, e drens ätofonds se logs omik.

„Ag, binob kio=neläbiku!“ - äsagom. - „Valikans smilons dö ob! Valikans ludigidons obi! Nek löfon obi pö vol lölik!“

Ästanom lunüpo, pedölo ta kiud me flom, ab drens älai=tofonds e no ästopikons [no äfinikons]. Süpo esenom, das ek adoaton omi len jot, e vög löfülik eka esagon:

„No drenorös, o Nenolikan!“

Eflekom oki ed elogom Blövalogikani.

„No nedos ad drenön.“ - edönuof.

Nenolikan edeflekom oki de of, egleipom kiudi me nams ed eprimom ad drenön nog laodikumo. Blövalogikan stiliko äloröbof joti omik me nam. Nenolikan eprimom ad tovülön [tirön dese of] joti, steifölo ad dejedön nami ofik, ed igo ämufedom me lög.

„Begö! No binorös so badiku!“ - äsagof löfüliko. - “Ga binor hicililu benik ä gudik. Ävilor lüjinön gudiku, klu äpleidülör e belugor obis. Ab denu ga no plu obitor somiko? Vo-li?”

Nenolikan äseilom.

„Sagorös das no obitor [somiko]. Ga binor benonatäliku!“

„Nö, binob badiku!“

„Ab ga utans badikum dabinons.“

„Nö, binob badikünu...“

„Neveratö! Klufülan äbinom badikumu ka or. Neai ädunor ludunis, kelis Klufülan ädälom oke, ab ga emenodom oki fino. Kludo, üf ovilor täno koo ucenor ad gudikum. Sagorös [Promorös], das denu no plu obitor



somiko e primorös lifi nulik. No plu omäniotobsös paseti.“

„No obitor!“ - Nenolikan murülom saäbäliko.

„Ekö, kiogudiko!“ - Blövalogikan äfredof. - „Denu osteifor ad binön snatiku, küniku ä visediku, odunor benodis, e no plu omutor miagön ad jinön gudikumu. Vo-li?“

„Vo.“ - Nenolikan egesagom.

Elogedom lügiko Blövalogikani ed esmililom to drens.

Blövalogikan egleipof nami omik:

„Tevogsös usio, kö valikans stadons.“

Suno atans ästadons lä klöpapiadil danüdik. Bastetül eküpom, das Nenolikan egevegom kobü Blövalogikan, ed ävokädom töbidiküno:

„Nenolikan binom cütanu! Nenolikan binom cuku!“

„Konolöd vio ifi=slugol lefogi!“ - Sirupül ävokädom.

„Kio=jemiko, o hicilils!“ - Blövalogikan evokädo. - „Kikodo häors omi?“

„Ab kikodo älugom?“ - Bastetül esagom.

„Vo-li äcütom oris?“ - Blövalogikan estunof. - „Äbelugom oris, ab äseilors - klu ästütors omi!“

„No binors gudikumu ka om!“ - Nifaflogülan evokädo. - „Ga äsevors, das lugom e pleidülom e nek [bevü ors] äropon omi. Nek äsagon ome, das atos binon badiku. Kikodo binors gudiku üfo?“

„No stetobs, das binobs gudiku.“ - Bastetül etovülom jotis.

„Täno no häorsöd omi if its no binors gudiku!“ -



Katülan evüikof ad spikot. - „Votikans üf binonsöv pö stad orsik ya bü lunüp iyufonsöv-la omi ad gudükumön oki.“

Bastetül e Sirupül ejemikoms, ed efinikoms ad häön Nenolikani.

Svalülan elügolof lü etan ed esagof:

„O miserabik! Ädrenor-li? Pe-fi-häor. Hicilils binoms so grobäliku, ab ojelodobs ori ta etans. No oleadobs häön eki ori“. Edegolof flanio ed ävisipof jicililes: „Nedos ad trätön omi löfülikumo. Ämibitom ed epönidom demü atos, ab nu eleceenom ed obitom gudiko.“

„Lesi!“ - Katülan äbalädof. - „Binos badiko ad häön. Uskanikom ed obitor nog badikumo. If opidobs omi, täno vemikumo odasuemom döbi okik ed ufi-gudükumom oki sunikumo.“

Jicilils ezüofs Nenolikani ed eprimofs ad pidön omi. Nenolikan esagom:

„Büikumo no ävilob flenön ko jicilils ed äcedob, das hicilils binoms gudikumu, ab nu suemob, das hicilils leno binoms gudikumu. Hicilils te ähäoms, ab jicilils ejelofs omi. Denu ai oflenob ko jicilils.“

*Reidolsös fövoti konota pö nüm fovik.*